

乾隆大藏經



釋淨室歌題





龍

藏

大乘經
華嚴部

普爲出資及讀誦受持
輾轉流通者回向偈曰
願此功德 回向有情
消除業障 增崇福祉
家門清吉 身心安寧
生入聖域 沒往西方
先亡祖妣 歷劫怨親
俱蒙佛慈 獲本妙心
兵戈永息 禮讓興行
人民安樂 世界和平
四恩總報 三有齊資
法界眾生 同證菩提

This book is for free distribution. It is not for sale. Printed in Taiwan.

公元二〇〇七年八月出版 恭印貳仟套

乾隆大藏經

景印重編
句讀版本

倡印者：淨空法師

印贈者：香港佛陀教育協會

出版者：財團法人桃園縣至善教育事務基金會

地址：桃園縣中壢市過嶺里16之38號

電話：（〇三）四二〇—七八〇九

傳真：（〇三）四二〇—七八一三

淨空法師
影音網址
http://www.budaedu.org.hk
http://www.amtb-aus.org
http://www.chinkung.org

E-mail：amtbhkl@budaedu.org.hk
purelandcollege@inet.net.au

承印者：世樺國際股份有限公司（〇二）二二四六九九二八

ISBN 978-986-83622-0-8

御制

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第十八冊目次

華嚴部

八三大方廣佛華嚴經六十卷

東晉佛陀跋陀羅等譯

卷第一～卷第六〇

(一) 世間淨眼品(卷一～二)	一	二九
(二) 盧舍那佛品(卷三～四)	三〇	六三
(三) 如來名號品(卷四)	六三	六九
(四) 四諦品(卷五)	七〇	七五
(五) 如來光明覺品(卷五)	七五	八六
(六) 菩薩明難品(卷六)	八七	九四
(七) 淨行品(卷六)	九四	一〇〇
(八) 賢首菩薩品(卷六～七)	一〇〇	一二五
(九) 佛昇須彌頂品(卷八)	一二六	一二七
(十) 菩薩雲集妙勝殿上說偈品(卷八)	一二七	一三三
(十一) 菩薩十住品(卷八)	一三三	一四五
(十二) 梵行品(卷八)	一四五	一四七
(十三) 初發心菩薩功德品(卷九)	一四八	一六八

(十四) 明 法 品 (卷一〇)	一六九	一八〇
(十五) 佛昇夜摩天宮自在品 (卷一一)	一八一	一八二
(十六) 夜摩天宮菩薩說偈品 (卷一二)	一八二	一八八
(十七) 功德華聚菩薩十行品 (卷一三)	一八八	二一〇
(十八) 菩薩十無盡藏品 (卷一四)	二一一	二二一
(十九) 如來昇兜率天宮一切寶殿品 (卷一五)	二二一	二三九
(二十) 兜率天宮菩薩雲集讚佛品 (卷一六)	二三九	二四六
(二十一) 金剛幢菩薩迴向品 (卷一七)	二四七	三九八
(二十二) 十 地 品 (卷一八)	三九八	四八九
(二十三) 十 明 品 (卷一九)	四九〇	四九七
(二十四) 十 忍 品 (卷二〇)	四九七	五一〇
(二十五) 心王菩薩問阿僧祇品 (卷二一)	五一〇	五二一
(二十六) 壽 命 品 (卷二二)	五二一	五二二
(二十七) 菩薩住處品 (卷二三)	五二二	五二四
(二十八) 佛不思議法品 (卷二四)	五二四	五五四
(二十九) 如來相海品 (卷二五)	五五五	五六五
(三十) 佛小相光明功德品 (卷二六)	五六五	五七一
(三十一) 普賢菩薩行品 (卷二七)	五七二	五八一

三十二	寶王如來性起品（卷三四～三七）	五八一	六三一
三十三	離世間品（卷三七～四四）	六三一	七五一
三十四	入法界品（卷四五～六〇）	七五二	一〇五四

大方廣佛華嚴經卷第一

湯一

東晉天竺三藏佛陀跋陀羅等譯

世間淨眼品第一之一

如是我聞。一時佛在摩竭提國寂滅道場。始成正覺。其地金剛具足。嚴淨衆寶雜華。以爲莊飾。上妙寶輪。圓滿清淨。無量妙色。種種莊嚴。猶如大海。寶幢幡蓋。光明照耀。妙香花鬘。周匝圍遶。七寶羅網。彌覆其上。雨無盡寶。顯現自在。諸雜寶樹。華光茂佛神力。故令此場地廣博嚴淨。光明普照一切奇特。妙寶積聚。無量善根莊嚴道場。其菩提樹。高顯殊特。清淨瑠璃。以爲其幹。妙寶枝條。莊嚴清淨。寶葉垂布。猶如重雲。雜色寶華。間錯其間。如意摩尼。以爲其果。樹光普照十方世界。種種現化。施作佛事。不可盡極。普現大乘菩薩道教。

佛神力故。常出一切衆妙之音。讚揚如來無量功德。不可思議。師子之座。猶如大海。衆妙寶華。而爲嚴飾。流光如雲。周遍普照。無數菩薩大海之藏。大音遠振。不可思議。如來光明踰摩尼尊。彌覆其上。種種變化。施作佛事。一切悉覩。無所罣礙。於一念頃。一切現化。充滿法界。如來妙藏。無不遍至。無量衆寶莊嚴寶臺。如來處此寶師子座。於一切法成最正覺。了三世法平等智身。普入一切世間之身。妙音遍至一切世界。不可窮盡。猶如虛空。平等法相智慧行處。猶如虛空。等心隨順一切衆生。其身遍坐一切道場。悉知一切衆生所行。智慧日光。照除衆冥。悉能顯現諸佛國土。普放三世智海光明。照淨境界。無量光明。充滿十方。不壞法雲。遍覆一切。以力無畏。顯現無

量自在力光。開方便門教化衆生。悉能普現一切衆會。猶如虛空而無來去了。達一切無有自性。隨順諸法平等之相。一切光明普現三世諸佛所行諸佛世界。猶如大海。不可思議音聲語言。悉能隨順。與十佛世界微塵數等大菩薩俱。其名曰普賢菩薩。普德智光菩薩。普明師子菩薩。普勝寶光菩薩。普德海幢菩薩。普慧光照菩薩。普寶華幢菩薩。普勝濡音菩薩。普淨德炎菩薩。普相光明菩薩。大光海月菩薩。雲音海藏菩薩。德寶勝月菩薩。淨慧光炎自在王菩薩。超趣華光菩薩。無量智雲日光菩薩。大力精進金剛菩薩。香炎光幢菩薩。月德妙音菩薩。光明尊德菩薩。與如是等諸菩薩俱。皆是盧舍那佛。宿世善友。一切成就功德大海。諸波羅蜜周滿普照。慧眼清

淨等觀三世。於諸三昧具足明淨。辯才大海深廣無盡。普現諸佛功德光曜。善知一切衆生心行。如應調伏。以金剛智普照境界。同一法性。覺慧廣大。甚深智境。靡不明達。住於一地。普攝一切諸地功德。無上智願。皆已成滿。具足如來深廣密教。悉得一切佛所共法。皆同如來行地德力。入於一切三昧海門。皆得自在。於衆生海。如應示現。隨其所行。善能建立。善入一切諸法之海。迴轉總持。如來一切功德法海。充滿其身。遍遊一切佛世界海。出生一切淨土願海。悉得諸佛達未來際方便智慧。一切如來坐道場者。普能往詣禮事供養。悉得一切普賢願海。於諸衆生智身滿足。復有佛世界微塵數金剛力士。其名曰堅固光曜力士。日光曜力士。須彌華力士。淨雲音

力士。阿脩羅王力士。勝光明力士。樹音聲力士。師子王力士。淳厚光藏力士。珠髻華光力士。與如是等諸力士俱。已於阿僧祇劫發大誓願。侍衛諸佛。佛願行處皆已具足。無量功德皆已清淨。悉行深廣三昧境界。無量神力。佛所遊處。無不遍至。皆悉能行。不可思議解脫境界。處一切衆其身殊特。無能映蔽。隨諸衆生所應度者。能現其身如應化之。復有佛世界微塵數諸道場神。其名曰淨莊嚴神。寶積光明神。乳音聲神。雨衆華神。莊嚴寶光神。善超香神。金色雲神。樂華樹神。莊嚴光神。與如是等道場神俱。皆於先佛造立願行。復與佛世界微塵數諸龍神俱。其名曰摩尼光龍。雜莊嚴龍。喜寶光龍。淨身光龍。香莊嚴龍。寶目光龍。如是一切皆於過去不可思議阿僧

祇劫。常爲如來莊嚴法堂。復與佛世界微塵數諸地神俱。其名曰淨華光神。善思光明神。雜華莊嚴神。散寶炎神。隨時樂觀神。金眼勝神。毛孔散香神。應時和音神。如是一切皆同德本。於過去佛所普修願行。復與不可思議諸樹神俱。其名曰雜華雲神。雜種光神。淨勝光神。垂莊嚴神。莊嚴光神。樂和音神。普勝等神。華果味神。如是一切皆悉成就大喜普照。復與無邊藥草神俱。其名曰光炎神。栴檀香神。淨光神。普稱神。普力神。普淨神。普光神。愛香神。勝現神。如是一切皆悉成就大悲普照。復與無量諸穀神俱。其名曰勝味神。華淨神。善力神。勢味神。根果神。淨華神。樂淨神。淨光神。如是一切大喜成就。復與無量諸河神俱。其名曰普流神。勝洄瀆神。洪流聲神。養水性

神。淨海光神。普愛神。妙幢神。勝水神。海具光神。如是一切常能精勤利益衆生。復與不可思議諸海神俱。其名曰寶勝光明神。金剛慧神。普涌浪神。雜華龍勝神。寶華光明神。須彌莊嚴神。海音聲神。如是一切以佛無量功德之海而自充滿。復與無量阿僧祇諸火神俱。其名曰熾然光藏神。熾然光輪神。廣明曜神。無盡神。雜寶勝神。照除諸冥神。炎雲光明神。如是一切悉爲衆生照除闇冥。復與無量諸風神俱。其名曰無礙照明虛空神。遍超勝神。散須彌神。炎淨味神。淨除味神。發行大音神。樹峯華林神。持世界神。如是一切皆能和合衆生。今不散復與無邊虛空神俱。其名曰普光淨勝神。無邊深廣神。起風神。離一切障神。廣超神。無對光炎神。無礙力勝神。最上妙

音神。示現十方神。如是一切心皆無垢堅固淨妙。復與無量主方神俱。其名曰善住神。充滿神。無量現光神。光莊嚴神。普轉漸行神。不惑轉神。淨遊虛空神。普行世間神。行甚深神。如是一切皆能善照一切衆生。復與無量主夜神俱。其名曰妙光神。淨光神。善觀衆生神。靜時堅固神。方便勝具神。生一切樹果神。無盡眷屬神。主知樂淨遊戲神。和諍神。淨福具神。如是一切於助道法深重愛樂。復與無量主晝神俱。其名曰現宮殿神。善解安立戰場神。樂莊嚴普勝神。善華香神。普集勝藥神。樂見王神。淨目高顯普勝神。大悲豔光神。光明善照神。普勝垂華神。如是一切皆悉信樂正法莊嚴。復與無量阿脩羅神俱。其名曰羅睺羅王。毗摩質多王。睽婆利王。明月王。金剛堅

錦王。大智慧力王。勝集天女王。如是一切悉能降伏。憍慢放逸。復與無量迦留羅王俱。其名曰大勇猛力王。無畏寶結王。勇猛淨眼王。不退莊嚴王。持大海光主。持法堅固王。勝根光明王。充滿普現王。普遊諸方王。普眼等觀王。如是一切成就。方便廣潤衆生。復與無量緊那羅王俱。其名曰善慧王。善幢王。雜華行王。離愛慢音王。寶樹光明王。善愛現王。莊嚴光王。善華幢王。勝地王。勝慧王。如是一切普於衆生精勤勸發。能使樂法。復與無量摩睺羅伽王俱。其名曰善慧王。淨端嚴音王。衆妙慧聚王。燈幢王。猛光王。師子香熏王。雜瓔珞音王。堅固樂明王。如是一切普爲衆生除諸疑網。復與無量鳩槃荼王俱。其名曰毗樓勒王。善修幢王。足平鮮白王。能除恐怖王。淨須

彌林王。無量淨眼王。無量目門王。如是一切皆悉修習無礙法門。復與無量鬼神王俱。其名曰毗沙門王。大音聲王。淨地王。大主王。炎眼王。堅固眼王。莊嚴勝軍王。大富淨身王。須彌力王。如是一切普能勤護一切衆生。復與無量月身天子俱。其名曰月天子。曜華天子。勝流莊嚴天子。樂諸世樂天子。眼光天子。淨光天子。普遊靜光天子。星宿王天子。淨覺天子。端嚴善光天子。如是一切勤以智慧普發衆生。無上寶心。復與無量日天子俱。其名曰日天子。眼炎光天子。須彌光勝天子。淨寶眼天子。勇猛不退天子。妙華鬘光天子。寶覺天子。明眼天子。勝地童子天子。普勝光天子。如是一切皆悉成就清淨善根。常欲饒益一切衆生。復與無量三十三天王俱。其名曰釋提桓

因天王。普稱滿天王。髻目天王。寶光稱天王。樂喜天王。樂念天王。勝音天王。淨華天王。如是一切悉皆具足清淨善業。能令衆生生淨妙處。復與無量夜摩天王俱。其名曰善時天王。無盡智天王。妙善化天王。樂樂炎天王。須彌光天王。不思議慧天王。齊輪天王。不思議天王。月婆顏天王。普莊嚴天王。如是一切皆悉勤修出生歡喜信樂知足。復與無量兜率天王俱。其名曰善喜天王。海樂天王。勝德天王。百光明天王。善眼天王。寶山月天王。超勇月天王。金剛善曜天王。樂超天王。如是一切皆悉成就念佛三昧。復與不可思議化樂天王俱。其名曰善化天王。淨光天王。最上雲音天王。妙色莊嚴天王。樂智慧天王。華光月天王。照方天王。如是一切皆悉成就寂靜法門。

調伏衆生。復與無量他化自在天王俱。其名曰自在轉天王。善眼天王。雜寶冠天王。精進慧天王。衆華香天王。樂光明天王。寂靜處天王。雜色輪天王。智慧妙光天王。大力光天王。如是一切普皆勤修自在正法。復與不可思議大梵俱。其名曰尸棄大梵。智光大梵。善光大梵。普音大梵。隨世音大梵。寂靜方便妙光大梵。淨眼光大梵。柔輭音大梵。如是一切悉具大慈度脫衆生。照除熱惱清涼柔輭。復與無量光音天子俱。其名曰樂光天子。淨光天子。大音天子。樂淨音天子。善思音天子。解脫音天子。深妙音天子。無垢光天子。最高淨光天子。如是一切安住喜光寂靜法門。復與阿僧祇遍淨天俱。其名曰淨智王天。現勝天。寂勝天。須彌時天。念淨眼天。無上愛光天。世慧

音天。智慧熾然天。樂法化心天。化高天。如是
一切常念衆生安住廣樂。復與無量果實天
子俱。其名曰法華光天。淨堅固天。慧光天。智
慧王天。普門慧眼天。不轉愛天。無垢淨光天。
淨曜天。如是一切皆悉善住寂靜意門。復與
摩醯首羅天等無量淨居天俱。其名曰善光
天。大主天。大稱光天。功德淨眼天。大智慧光
天。不動光音天。善施眼天。樂大乘天。普音聲
天。樂稱光天。如是一切已備無相平等法界。
悉在如來大衆海數。於一切衆生悉行平等。
無量妙色皆已成就。於十力中能善安住。處
一切衆而不傾動。隨所至方無能壞者。如來
所乘常現在前。離煩惱障。其心清淨。諸結使
山皆已摧滅。觀佛姿顏無量妙色光明普照。
所以者何。如來往昔於無量劫行菩薩道時。

以四攝法善攝衆生。於諸如來集諸善根。種
種因緣。方便教化。立如來道。深植無量如來
善根。皆令安立一切智道。逮得無量功德勢
力。皆悉成就。如來願海。菩薩所行具足清淨。
各隨本行皆得出要。悉由如來光明照故。乘
解脫力入如來海。於佛法門悉得自在。善海
摩醯首羅天。於法界虛空寂靜方便光明法
門。而得自在。大自在稱光明天。於一切法普
遊法門。而得自在。功德淨眼天。於一切法不
生不滅方便法門。而得自在。大慧光天。於一
切法方便智海遊光法門。而得自在。靜光音
天。於一切禪無量喜樂普起法門。而得自在。
施善眼天。於轉癡畏遊靜法門。而得自在。不
思議天。於無量境界入不起法門。而得自在。
樂大乘天。於一切法不來不去無所依住法

門而得自在。普雜音天。於佛境界寂靜法門。而得自在。樂稱光天。於無量境界法門。而得自在。爾時善光海大自在天。以如來神力故。觀察一切自在天衆。以偈頌曰

無盡平等妙法界。悉皆充滿如來身。
無取無起永寂滅。爲一切歸故出世。
諸佛法王出世間。能立無上正教法。
如來境界無邊際。世間自在稱無上。
佛難思議無倫匹。相好光明照十方。
大聖世尊正教導。猶如淨眼觀明珠。
一切世間衆生類。不能思議佛功德。
消滅一切愚癡闇。超昇無上智慧臺。
如來功德難思議。衆生見者煩惱滅。
得見不動自在尊。能生無量悅樂心。
衆生大海癡蔽心。爲現寂靜微妙法。

能然無上智慧燈。是則方便真淨眼。
如來清淨妙色身。悉能顯現遍十方。
此身非有無所依。如是見佛真實觀。
如來音聲無罣礙。應受化者無不聞。
湛然不動無往返。是名善慧樂法門。
一切十方無邊佛。寂靜法門天人主。
如來光明靡不照。是莊嚴幢妙法門。
佛於無邊諸劫海。常求正覺悟衆生。
無量方便化一切。清淨廣稱如是見。
復有樂業光明天王。於觀一切衆生諸根法。
雲法門而得自在。淨堅固天。於一切佛妙色。
方便念觀法門而得自在。樂業天王。於一毛。
孔見不思議諸佛國土境界法門而得自在。
普門慧眼天。於入普門觀察法界法門而得自在。
不轉愛天。於轉一切衆生處處受生法。

門而得自在。善慧光天。於入一切世間境界。不可思議法門而得自在。無垢淨光天。於一切衆生一切法中出要法門而得自在。無垢光天。於受化者能入佛境界法門而得自在。爾時樂業光明天王。承佛神力。觀察一切果實天衆。以偈頌曰

一切佛境界 甚深難思議 諸餘衆生類
莫能測量者 如來善開導 無量諸群生
能令悉願樂 志求無上道 佛以神通力
住世普開化 一切衆生類 各隨其所聞
癡惑障未除 慧命淨無穢 能觀諸如來
衆妙淨法海 諸法真實相 寂滅無所依
如來方便力 能爲衆生現 如來於諸法
無性無所依 而能現衆像 顯相猶明燈
以諸緣譬喻 方便隨所樂 爲現諸如來

智慧神通力 因悟各異門 無量難思議
爲建正法幢 令入功德海 如來神通力
能於一毛孔 各爲衆演說 無上寂滅法
一一諸如來 各爲其眷屬 顯法無量門
功德之大海 皆悉師子吼 演說諸佛法
是則大智尊 無上方便力 十方諸佛土
一切群生類 悉能爲彼現 如來之正法
如來未曾有 去來之異相 皆令彼歡喜
不退慧境界 如來爲衆生 普現業報相
猶若日光照 衆像靡不現 又爲彼衆生
演說寂滅法 令彼見真實 甚深智慧處
如來自觀察 甚深微妙義 隨彼衆生根
普雨甘露法 爲開諸法門 無量難思議
悉歸入寂滅 平等真實觀 無數無量劫
廣修習大悲 速成等正覺 度脫群生類

普雨甘露法 隨器皆充滿 如龍興慶雲
等雨於一切

復有淨智天王。於觀衆生善根法門而得自在。顯妙天王。於一切有覺照法門而得自在。勝妙天王。於總持辯才法門而得自在。音燈天王。於樂佛出世解脫法門而得自在。智炎天王。於一切衆生甚深法中能生歡喜法門而得自在。樂化天王。於化菩薩功德周備入無盡法門而得自在。踊化天王。於普觀無量苦惱衆生慈悲智滿法門而得自在。爾時淨智天王承佛神力。普觀遍淨天衆。以偈頌曰

諸佛正法無障礙 周滿十方無量衆
現佛境界難思議 離垢法門無量海
如來處世無所依 法身清淨無起滅
而能照現無量土 一切悉見天中天

無量劫海修方便 光明普照十方界
清淨法界如如住 寂滅微妙最無上
衆生愚癡瞽心目 無限輪迴生死中
如來導以清淨道 開示無上最勝門
如來所乘無上道 一切衆生莫能思
佛現一切妙色門 善念樂觀淨眼見
佛說微妙總持門 如一切刹微塵等
調伏一切衆生故 清淨慧明能照見
如來出世甚難值 無量億劫時一遇
離諸難處適衆會 唯佛世尊能應時
一切衆生難思議 佛能悉現淨妙法
覩見如來無量德 猶如明照見衆像
三世諸佛所得法 教化衆生難思議
悉觀念此功德已 樂法踊躍大歡喜
衆生沒在煩惱海 愚癡邪濁大恐怖